

# Poeti Castellammaresi





**ARBA 'NTA LU GURFU DI  
CASTEDDAMMARI**  
di *Mario Maimone*  
Castellammare del Golfo (TP)

Russia lu celu a lentu, ddà a livanti,  
c'è ciuciuliu d'aceddi, l'aria è duci,  
lu mari è argentu vivu e fa cancianti,  
li stiddi 'n celu astutanu la luci.

Di supra la muntagna c'è pusata  
na negghia fitta comu mattulidda,  
mi pari na cuperta stinnicchiata,  
pi quantu lu so corpu 'un s'arrifridda.

E poi chiù fora, 'n menzu a l'acqui scuri,  
c'è na lucerna chi va naculiannu:  
na varca c'è, cu supra un piscaturi,  
chi lentu li so' rizzi va tirannu.

Na serpa nesci lesta di la tana,  
un cani a la campìa chi va abbaiannu,  
nta la ciumara canta la giurana,  
na frotta di cardiddi sta vulannu.

C'è un vinticeddu friscu e profumatu,  
chi dunni passa, pari fa carizzi,  
e va dicennu: “Un stari chiù curcatu,  
'ràpiti l'occhi e varda sti biddizzi!”

Lu celu va 'nchiarennu, a manu a manu,  
lu munnu a lenti passi s'arruspigghia,  
lu suli spunta poi beddu baggianu,  
taliu 'ncantatu sta gran maravigghia!



**A CASTEDDAMMARI**  
*di Girolamo Caleca*  
Castellammare del Golfo (TP)

Oh delizia mia  
e di cu' è chi vidi a tia,  
si' sempri 'n armunià  
'nta lu gurfuzzu to.  
Mi pari 'na rigina,  
mi pari 'na sirena,  
si rumpi 'sta catina  
finisci 'a to beltà;  
tu mi facisti nàsciri,  
tu mi facisti crìsciri,  
'n menzu li to' biddizzi,  
'n menzu li to' buntà.  
E quannu qualchi vota  
ti lassu sula sula  
mi pigghia la paura  
di nun turnari chiù.  
L'amuri chi ti vogghiu  
è troppu granni assai,  
fammi ristari cu tia,  
accussì nun moru mai!

**CAMPANI E MARCIAPERI**  
di *Giuseppe Caleca*  
Castellammare del Golfo (TP)

Don! Don! Don! Risona.  
Straviàti e sbattuti viti  
Scavunianu lu tempu,  
di ddi sulitari notti.

E ripigghia lu battagghiu  
Di dd'antica campana,  
a 'ntunari vota e svota,  
ogni appirimintatu jocu.

Sbattinu e ritornanu,  
cruzzannu li pinseri,  
cu ddu muru di fangu,  
di nenti e nuddu canusciutu.

A dritta e reversa  
lamintusi marciaperi,  
fannu marvaggia cumunìa,  
cu ddi tinti arridduciuti viti.

Smacirìanu li sentimenti,  
'n capu pirsuasi litanii,  
intra scurusi notti,  
sfirriànnu a l'aria ogn'arma.

E quali campani mai,  
ponnu megghiu 'ntunari  
di ssi distruruti cori  
chi nta li notti arragghianu?

Na lacrima addiventa tisoru,  
mentri vola na fracca spiranza,  
di novi arbi scummigghiàti,  
disiànnu riposu a lu cori!



**DI PASSAGGIU SEMU**  
di *Matteo Pagano*  
Castellammare del Golfo (TP)

‘N capu stu munnu di passaggiu semu  
e poi comu la cinniri squagghiamu,  
allura picchè beni nui facemu  
e sempri la superbia nui purtamu?  
Chi tanti fratuzzi semu  
nuddu ci pinzamu  
e chi semu tutti figghi  
di Diu Patri suvranu.  
Niatri, tanti fratuzzi puvireddi avemu  
e ogni vota chi li ‘ncuntramu,  
facemu finta chi ‘un ni li videmu.  
Ma ci pinzamu nuddu chi muremu?  
e unu cu l’atru eca ni disprizzamu...  
Ma quannu semu ‘nta ‘ddu munnu arcanu,  
la superbia ddà ni la scurdamu  
e quannu è giunta l’ura chi muremu,  
appressu nudda cosa ni purtamu!  
E a la fini chi pussidemu?  
Tanticchia d’ummira  
sutta ‘n arvuliddu di giraniu.



**DULURI DI MATRI**  
*di Gaspare Pipitone*  
Castellammare del Golfo (TP)

‘Stu fattu chi vi cuntu fu successu  
mentri chi a l’ottu la scola grapìa:  
‘na grossa cani mi curri d’apressu,  
cu gran ‘nsistenza e cu mantrinaria;  
pigghiavi un beddu scantu, lu cunfessu,  
picchè ‘un sapennu chi cosa vulìa,  
misi ‘n tutta la scola un gran ruspigghiu:  
povira matri, circava lu figghiu.

Successi ‘nta la scola un ammuinu,  
specialmenti a li matri di famigghia,  
chi scena dulurusa, chi distinu  
chi appi ‘ddu cani e fu ‘na maravigghia;  
‘dda genti tinta e figghi di cainu  
vonnu a ‘ddu cani chi di pena squagghia  
e senza nudda pena, a l’impinzata  
ci lu jittaru ‘nta la cancellata.

Ogni matina, sempri a la stess’ura  
cu li picciotti si metti a filera,



trasi di corsa, cu tanta primura,  
cerca piatusa, talìa ‘nta la cera  
comu pi diri: “La me criatura?”  
e suspirannu di truvallu spera.  
Ci rispunnemu: “ ‘Un fu pi sequestro,  
a boni manu l’alleva un maestru!”